

佛說大集法門經

宋西天三藏朝奉大夫試光祿卿傳法大師施護奉 詔譯

佛說大集法門經卷上

下同

薄十

宋西天三藏朝舉大夫跋光祿卿傳法大師施護奉詔譯

如是我聞一時世尊遊行至彼末利城中與

苾芻衆而共集會時彼城中有一淨信優婆

塞亦名末利於其城內新造一舍種種嚴飾

清淨寬廣是舍先未曾有沙門婆羅門等安

止其中時末利優婆塞聞佛世尊與苾芻衆

遊行至此心生歡喜即詣佛所到已頭面禮

世尊足禮已合掌退住一面白佛言世尊我

是優婆塞名曰末利我於世尊心生淨信我

此城中新造一舍清淨寬廣是舍先未曾有

沙門婆羅門等安止其中我今請佛及苾芻

衆於我舍住願佛世尊愍我故受我所請

爾時世尊默然而受時末利優婆塞知佛默

然受所請已即時頭面禮世尊足右繞三匝

清刻龍藏佛說法變相圖



出離佛會還彼舍中重復嚴飾徧諸舍宇悉以香水散灑其地內外一切普令清淨時末利優婆塞如是嚴淨所造舍已還詣佛所到已重復禮世尊足前白佛言世尊先所造舍悉以香水散灑其地內外清淨願佛世尊及苾芻衆往彼舍住今正是時爾時世尊與大苾芻衆等恭敬圍繞往彼末利優婆塞所造新舍到彼舍已佛先洗足乃入其舍入已周匝普徧觀察佛即於舍中間安詳而坐諸苾芻衆亦各洗足次第而入禮佛足已於佛後面次第而坐末利優婆塞後入其舍禮世尊足合掌恭敬普徧頂禮諸苾芻衆乃於佛前一面而坐爾時世尊種種慰諭彼末利優婆塞已即爲如應宣說法要示教利喜時末利優婆塞聞法歡喜心生淨信如是世尊爲彼

優婆塞如應說法示教利喜而過多夜佛即告言末利過是夜已當自知時是時末利優婆塞聞佛言已即從座起禮世尊足合掌恭敬普徧頂禮諸苾芻衆繞佛三匝出離佛會爾時世尊見彼末利優婆塞離會未久即告尊者舍利子言我此聲聞苾芻已離睡眠皆是離塵清淨大衆若諸苾芻樂說法者即當隨應而自宣說隨所利益不應止息時尊者舍利子受教而住爾時世尊即以僧伽梨衣等爲四襲處師子牀右脇著地吉祥安隱累足而卧佛卧未久爾時異處有外道尼乾陀惹提子等於聲聞苾芻而生輕謗欲作破壞欲興鬭諍出非法語種種毀訾作如是言我所知法彼聲聞人不能了知彼所有法我如實知邪行是汝正行是我有利益是我無利

益是汝汝所說法前言縱是後言即非後言或是前言還非而不能作大師子吼說法利益時尼乾陀惹提子等欲興廣大闡諴因緣發如是等毀訾語時各各相視面目慘惡復作是言諸聲聞苾芻色相威儀而不寂靜不能離貪未得解脫不能見法不能善知彼出離道不能證彼所向聖果彼所習法非正等正覺所說發如是等毀訾語言興闡諴事爾時尊者舍利子知是事已即自思念如來大師宴卧未久不應以是因緣而白世尊作是念已告諸苾芻言汝等當知異處有諸外道尼乾陀惹提子等於聲聞苾芻而生輕謗欲作破壞欲興闡諴出非法語種種毀訾彼作是言我所知法諸聲聞人不能了知彼所有法我如實知邪行是汝正行是我有利益是

我無利益是汝汝所說法前言縱是後言即非後言或是前言還非而不能作大師子吼說法利益諸苾芻彼尼乾陀惹提子等欲興廣大闡諴因緣發如是等毀訾語時各各相視面目慘惡復作是言諸聲聞苾芻色相威儀而不寂靜不能離貪未得解脫不能見法不能善知彼出離道不能證彼所向聖果彼所習法非正等正覺所說發如是等毀訾語言興闡諴事諸苾芻汝今當知我等諸聲聞大眾皆是離塵清淨心者現證諸法善能了知諸出離道各各已得所證聖果我等聲聞所修習法一一皆是如來大師應供正等正覺親所宣說一一真實而無虛妄諸苾芻當知佛所宣說謂契經祇夜記別伽陀本事本生緣起方廣希法如是等法佛悲愍心廣爲

衆生如理宣說而令衆生如說修習行諸梵行利益安樂天人世間

復次諸苾芻當知一法是佛所說謂一切衆生皆依食住此爲一法如是等法佛悲愍心廣爲衆生如理宣說而令衆生如說修習行諸梵行利益安樂天人世間

復次二法是佛所說謂一名二色如是等法佛悲愍心廣爲衆生如理宣說而令衆生如說修習行諸梵行利益安樂天人世間

復次三業是佛所說謂一者身業二者語業三者意業即此三業復有二種一善二不善
薄十何等爲善謂身業善行語業善行意業善行不善行復次三不善思惟是佛所說謂欲思惟瞋思惟害思惟復次三善思惟是佛所說

謂離欲思惟無瞋思惟不害思惟復次三不善根是佛所說謂貪不善根瞋不善根癡不善根復次三善根是佛所說謂無貪善根無瞋善根無癡善根復次三漏是佛所說謂欲漏有漏無明漏復次三求是佛所說謂欲求有求梵行求復次三愛是佛所說謂欲愛色愛無色愛復次三界是佛所說謂欲界色界無色界復次三不善界是佛所說謂染欲界瞋恚界損害界復次三善界是佛所說謂無欲界無瞋界不害界復次三有是佛所說謂欲有色有無色有復次三聚是佛所說謂邪定聚正定聚不定聚復次三受是佛所說謂樂受苦受非苦樂受復次三苦是佛所說謂輪迴苦苦壞苦復次三種欲生是佛所說謂現處欲欲生化樂欲欲生他化自在欲欲

生復次三種樂生是佛所說謂有衆生生生已受樂如人中一類是名第一樂生復有衆生長受喜樂此樂廣大適悅慶快如光音天是名第二樂生復有衆生乃至盡壽受快樂足如徧淨天是名第三樂生復次三種福事成就慧行是佛所說謂布施莊嚴成就慧行持戒莊嚴成就慧行禪定莊嚴成就慧行復次三三摩地是佛所說謂有尋有伺三摩地無尋唯伺三摩地無尋無伺三摩地復有三三摩地是佛所說謂空解脫三摩地無願解脫三摩地無相解脫三摩地復次三住是佛所說謂天住梵住聖住復次三根是佛所說謂未知當知根已知根具知根復次三增上是佛所說謂世增上法增上我增上復次三佛是佛所說謂過去諸佛未來諸佛現在諸

佛復次三言說事是佛所說謂過去言說事未來言說事現在言說事復次三眼是佛所說謂肉眼天眼慧眼復次三明是佛所說謂宿命智明衆生生滅智明漏盡智明復次三通是佛所說謂神境通說法通教誠通復次三不淨是佛所說謂身不淨語不淨心不淨復次三淨是佛所說謂身淨語淨心淨復次三學是佛所說謂戒學定學慧學復次三品是佛所說謂戒品定品慧品復次三火是佛所說謂貪火瞋火癡火復次三分位是佛所說謂生分位成分位法分位如是等法佛悲愍心廣爲衆生如理宣說而令衆生如說修習行諸梵行利益安樂天人世間

復次四念處觀是佛所說謂觀身不淨無生起想調伏無明離煩惱受觀受是苦觀心生

滅善觀諸法亦復如是復次四正斷是佛所說謂已生諸不善法發勤精進攝心志念皆悉斷除未生諸不善法發勤精進攝心志念皆防令不起未生諸善法發勤精進攝心志念而令生起已生諸善法發勤精進攝心志念而令一切增長圓滿此名四正斷復次四神足是佛所說謂欲三摩地斷行具足神足精進三摩地斷行具足神足心三摩地斷行具足神足慧三摩地斷行具足神足復次四禪定是佛所說謂若苾芻已能離諸欲不善法有尋有伺此名第一離生喜樂定若復苾芻止息尋伺内心清淨安住一想無尋無伺此名第二定生喜樂定若復苾芻不貪於喜住於捨行身得輕安妙樂此名第三離喜妙樂定若復苾芻斷除樂想亦無苦想無悅意無

惱意無苦無樂此名第四捨念清淨定如是等名爲四禪定復次四無量是佛所說謂若苾芻發起慈心先於東方行慈南西北方四維上下亦然行慈而彼慈心於一切處一切世界一切種類廣大無量而無邊際亦無分限此名慈無量悲喜捨三亦復如是此等名爲四無量復次四無色定是佛所說謂若苾芻離一切色無對無礙而無作意觀無邊空此觀行相名空無邊處定復離空處而非所觀但觀無邊識此觀行相名識無邊處定復離識處而非所觀但觀一切皆無所有此觀行相名無所有處定復離無所有處行相名爲非想非非想處定如是名爲四無色定復次四智是佛所說謂法智無生智等智他心智復次四安住是佛所說謂一切行安住捨

行安住寂靜行安住慧行安住復次四聖諦是佛所說謂苦聖諦苦集聖諦苦滅聖諦苦滅往向聖諦復次四種布施清淨是佛所說謂有布施施者清淨非受者或有布施受者清淨非施者或有布施亦非施者亦非受者謂所施清淨或有布施施者受者二俱清淨復次四生是佛所說謂胎生卵生濕生化生復次四種母胎事是佛所說謂有能了知入母胎事住母胎事出母胎事此名第一母胎事有能了知入母胎事住母胎事不能了知出母胎事此名第二母胎事有能了知入母胎事不能了知住母胎事出母胎事此名第三母胎事有不能了知入母胎事住母胎事出母胎事此名第四母胎事如是等名爲四種母胎事復次四識住是佛所說謂色生色

綠色住喜行廣大增長是識所住受生受緣受住喜行廣大增長是識所住想生想緣想住喜行廣大增長是識所住行生行緣行住喜行廣大增長是識所住如是等名爲四識住復次四法句是佛所說謂神通法句離恚法句平等法句平等三摩地法句復次四娑摩那曩法是佛所說謂若現在樂此爲苦報若現在苦此爲苦報若現在樂此爲樂報若現在樂此爲樂報此名四娑摩那曩法復次四向是佛所說謂無忍忍調伏寂靜復次四神通道是佛所說謂苦遲緩神通苦速疾神通樂遲緩神通樂速疾神通復次四預流身壞不毀沙門婆羅門天人魔梵了知世法有一類預流心得清淨證得佛法正見正行各

各了知自所修法有一類預流心生喜樂見在家者及彼出家持淨戒者心生尊敬有一類預流自修淨戒具足不壞智慧明利善相寂靜如是等名爲四預流身復次四沙門果是佛所說謂須陀洹果斯陀含果阿那含果阿羅漢果復次四取是佛所說謂欲取見取戒禁取我語取復次四三摩地想是佛所說謂有見法得樂行轉此爲三摩地想有知見轉此爲三摩地想有慧分別轉此爲三摩地想有身得漏盡轉此爲三摩地想復次四力是佛所說謂慧力精進力無礙力攝力復次四補特伽羅是佛所說有補特伽羅謂我能修行我持戒我如法相應非他能修行非他持戒非他如法相應有補特伽羅謂他能修行他持戒他如法相應非我能修行非我持

薄十

九

戒非我如法相應有補特伽羅謂我能修行他亦能修行我持戒他亦持戒我如法相應他亦如法相應有補特伽羅謂我不能修行他亦不能修行我不持戒他亦不持戒我不如法相應他亦不如法相應如是等名爲四補特伽羅復次四隨衆事是佛所說謂與衆同一住處與衆同一飲食與衆同一懺悔與衆同一受用復次四大輪是佛所說謂善說妙法依止正士願心平等修先慧行復次四攝法是佛所說謂布施愛語利行同事復次四無礙解是佛所說謂義無礙解法無礙解樂說無礙解辯才無礙解復次四煩惱是佛所說謂欲煩惱有煩惱見煩惱無明煩惱復次四行是佛所說謂欲行有行見行無明行復次四身聚是佛所說謂無明身聚瞋身聚

戒禁取身聚一切著身聚復次四愛生是佛所說謂有苾芻因彼衣服而生愛心愛心起故即生取著有苾芻因彼飲食而生愛心愛心起故即生取著有苾芻因坐卧具而生愛心愛心起故即生取著有苾芻因諸受用而生愛心愛心起故即生取著此名四愛生復次四食是佛所說謂段食觸食思食識食復次四不護是佛所說謂如來不護身業身離諸過如來不護語業語離諸過如來不護意業意離諸過如來不護壽命命無損減復次四顛倒是佛所說謂無常謂常是故生起想顛倒心顛倒見顛倒以苦謂樂是故生起想心見倒無我謂我是故生起想心見倒不淨謂淨是故生起想心見倒如是等名爲四顛倒復次四惡語言是佛所說謂妄言綺語兩

舌惡口復次四善語言是佛所說謂如實語質直語不兩舌語依法語復次四非阿曳羅行是佛所說謂不見言見不聞言聞失念言記念不知言知復次四阿曳羅行是佛所說謂實見言見實聞言聞不失念言記念實知言知復次四記是佛所說謂一向記分別記返問記默然記如是等法佛慈愍心廣爲衆生知理宣說而令衆生如說修習行諸梵行利益安樂天人世間
佛說大集法門經卷上